

Galasia batane nenacauru rai

Faborohacha letoai

“Inara coaaucaun,” naa Faboro.

1 ¹Canuna Faboroneeun. Coatiha, cachaauru canu cocoainain canu letoain nihei. Jesocurisito aina rai Inaca Cana Coaunera- nii ohane caje ichateralute canu cocoainain caletoaain nelu. ²Cau canu aina nenacauru- canejeraauru aina jiniiquiin neeinna, satiin Galasia batane que Jesocurisito ranojoneein neiniquichene rai caa quiricha laenaan. ³Cana Inaca Cana Coaunera, rai Calaohi Jesocurisito, naaonjoainuri aina jiniiquiin raotojoeine neeichene jaanu teeuruhine inara rai. ⁴Nii Jesocurisitote cana osa coreniha ohelu, cau chauratane que itolere curuaanaanein niha moconajaerane jaun aina jiniiquiin caseteco coaracaachene rai nena caje, aina cuaain cana ichoteratihane coina, nitohaneein jeriha Cana Coaunerane jaun. ⁵Nii coreniha Cana Coaunera coroaecuruhine itolere bana. Nitohane-miin.

“Coatiha nihei nii baiha cana ichoterateraanu,” naa Faboro

⁶Jataaine inara cojoelatoon, inara belaiha rai Calaohi Jesocurisitone coreniha inara raain nihalu Cana Coaunerane saijieein, nii niicha tei erenaa que

jaolequiin leeocho cana ichoteranihei erenaa sacuhichene jaun. ⁷Nete nene leeocho cana ichoteranaan erenaa. Inara laurijiracuru tabaaurute, inara rohecaain, nii inara ichoteranein niha Jesocurisitone que erenaa corenaa jerecure. ⁸Nete laen, inae nii inara relaacaanune jaan corenaa coacuhin leeocheanein nena erenaa que inara relaera nihane casetecareein Cana Coaunera. Canu leeocho erenaa que inara relaanune nihanatiinte canu casetecareein Cana Coaunera. Leinjiiin anjera dede caje fauhin, leeocho erenaa que inara relaane nihanatiinte casetecareein Cana Coaunera. ⁹Jerichanetojoeine nacoahaunein caa aitoreeunni. Chunocoha inae nii jauriaanejeein nena erenaa inara relaacaanune jaan corein leeocheanein inara relerate casetecareein Cana Coaunera. ¹⁰Coatiha baaso ichaenihanune caohacha ichacaanune coaracuruha cachaaurune jerenacaan aitohaaun. Cana Coaunerate baaso ichaenihanune caohacha ichacaanune coitucureein. Jana jerecuruha cachaaurune rijjiejiein jerichaaunne coatiha esinae rauhijiriin Jesocurisito letononein nerihaaun.

Jesocurisito letono Afosoto niha nunuhetihane biha Faboro.

¹¹Aonacuche canejeraaurune caa que inara rai aitete coitucuhiche. Coatiha

cache suujua caje unaa nihei nii osa caje cana ichoterateraanu erenaa- caa inara rai canuhacha beebejei. ¹²Niheichu, leinjiin cache nii que canu relaain niheilu. Leinjiin Jesocurisitohachate canu que nii coitucuerateein nelu.

¹³Nii coitucuhichene rijijieeine, canuhetonai jaiti Jorionichaanune ichao que ichaohanune bana Cana Coaunera rai Jesocurisito ranojioinein nenacaauru- iclesiacuru laurichuru que nejerateein, acaauru roerohecaain acaauru itajenaa jereeunlu. ¹⁴Nii Jorionichaanune ichao que jaiti ichaohanune banane, jataain leeochoaauru canu araachuru, canu rijiu nenacaauru amurijiriin canacaanu foerateracuru ichao rijijieein ichaohin, nii canacaanu ichao corera caohateein beraain nerejetoonu. ¹⁵Nete, inae catohaneein rai letononeein nihanune coina- jaiti nejanoaenihanune jana canu janijiiin canu raain nelu Cana Coaunera, jataain canu belaitohane jaun. ¹⁶Nii jaunte, inae nitohaneein jerihalune jaan que inae tihane jaun, canu que rai Calaohi coitucuerate, coreniha osa caje nichoteeururichaaain cacheaurune beebejihanu Jorioniheichuru raine coina. Coatihai nii chuni aina ereein aihaaunlu. ¹⁷Coatihachu, Jerosaleeun nii canu ajiniha Jesocurisito letono afosoto neein nenacaauru coaraain acaauru rai irihanune coina cuhaaunlu. Nitohanena coacuelanaalane jauriaane- jeein Arabia batane kuhin- nii baiha Damasocoo cauha uunlu.

¹⁸Nii baiha nichata jaanacaain catiaainne Jerosaleeun cuunlu, ecu Fedoro coaraain coitucuhanune coina. Ecuna aina neeunlu lechoonca saoqui janohin. ¹⁹Nena laen, leeochoaauru afosotooru coaraeneeunlu, acaihaniji cana Curuaanaa Jesocurisito ocoala Saantiaaochane coaraaunlu. Ecu,

niheilu nii baiha chuni. ²⁰Cana Coaunera notaracaaene esinae rauhijiriin nohanelanaala aitiin caa laenaun inara rai.

²¹Nii baihane Siria, Silisia, naaonjoaiunru batanecuru cuunlu. ²²Nete, jaiti raajenihane canu coitucuu- renelu Jodea nenacaauru- Jesocurisito ranojioinein nenacaauru iclesiacuru. ²³⁻²⁴Raujiaainchate: “Taolu jauriaa cana que nejerateein cana roerohecaain cana itajenaa jerera jetaote, inae enene amuhemujueein caa canacha esenetai erenaa que cacheaauru relae,” naain canu benaa coitucuhin, canu coreniha Cana Coaunera coroaecurelu.

Afosoto niha Faborone esenetaauruha leeochoaauru afosotoorune

2 ¹Lechoonca jena jaanacaain nii baiha catiaainne, nacoaauneein Jerosaleeun cuhaacaunlu Berenabeen aina. Chaen nechu canu jiniichaain Tito netonai amaaunlu. ²Nitohaneein cuhanune jeriha Cana Coaunerane jaunne ucuaae cuunlu. Inae turuhinne, ecu nenacaauru Jesocurisito ranojoihunru coaraneein nenacaauru aina nejesinajeein ita taojiaain, “Naaon- joaainne Jorioniheichuru rai ichoterate- nojoinichaachene que erenaa beebejeeun,” naai beeun acaauru rai, nabana joaereein cacheaauru relaa canu beein baasoneein caetena coaacu- ruhane coataa. ³Nete, ecu niha canu aina Tito- Curiecocuru caje nenaanihane saijieein, jaberoco machi cari saeratihane coina aitocurene saain nii ecu canu aonajeurereraauru. ⁴Nii janate, nechu joaenreein acaneein nelanaala Jesocurisito coreniha cana nejeraauru niha nocoetonacaauru- canacaanu que nasiin turuure nechu esinae rauhijiriin- Moisesa rai Cana Coauneraacha tei rauhi tonoraelanaala Jesocurisito

aitoonjoaacha tonoraacaanune coaracuruhane coina. ⁵Nena nii aansijiiniji acaauru ere tonorana jerenihacaanu, nabana inae inara relaacaanune saijieein nii inara relaacaanune jaan jianein acaauru esenetaaichene jerenihacaanune jaun.

⁶Nii iclesianein nenacaauru curuaanaa neein coitucunojonein nenacaauru, coatiha nii canuhacha beebejei baiha cuaain cha beuruhi. Nete leeochoaauru curuaanaa neeuruhane niha natiin, canu curuaanaa neeurene, namute cacha rai chanein niha cachane niha natiin leeocheenein coaraeniha Cana Coaunerae jaun. ⁷Nitohanein canu relanaa coacuelanaalate, Cana Coaunera, Jorioocuru rene cuhin acaauru relaa Fedorone coina letoaalune rijijieein, Aca, Jorioniheichuru rene cuhin, acaauru netonai osa caje ichoteratenojonein neeururichaaone beebejihanune coina canu letoaane que inae nainacure. ⁸Nitohaneinte, nii jeelai Cana Coaunera, afosoto neein Fedoro cocoinaain Jorioocuru rene letoaera- afosoto neein canu netonai cocoinaain canu letoaelu Jorioniheichuru rene.

⁹Nii jaunte, nitohanein inae Cana Coaunera, nii canu rai amihanenaa tihane esenetaauruhane jaun, acaauru amihaneeo que acaauru coroatajanera neein Berenabeen aina canacaanu raauruhane coaratiha, satiin notaracaee canacaanu belaan raotojoein canacaanu raore, nii ecu nenacaauru rai jataain leeochoaauru amurijiriin nelateinein acaauru coaranein nenacaauru, Saantiaao, Fedoro, Joaan, naaonjoainuri. Nitohanein canacaanu raainte, Jorioocuru aina neein acaauru relaauruhane tonohanau canacaanu netonai Jorioniheichuru rene cuhin acaauru

relaacaanune jerecure. ¹⁰Raujiaainchate laen inae jauriaalu caje coaunein coaaucaanlune rijijieein, cairicheihuru coacuhin acaauru coroatajanichaanu chaelai quene coina canacaanu rai aitocurelu.

Antioquihau Fedoro suujuatiha Faboro ne

¹¹Nena laen, Antioquihau nihanune jana canu rene turuha uha Fedorone bana, rai nacatiha neein aitoonlu raijaain baaso neein ichaane jaun, ¹²jauriaanejeein Jorioniheichuru aina lenonein naaonjoaane saijieein inae ecu turuuruha Saantiaao laurichuru- Jorionein nenacaaurune jana inae nii Jorioniheichuru caje nelerue Fedoro, nii ena turunaa jaberoco cari macohi molorera coasihane jaun. ¹³Nii jaunte nitohanein baasonein ichaa Fedorone rijijieein ichacure leeochoaauru Jesocurisito esenetaeraauru Jorioocuru, Berenabeen netonaine maajeein. ¹⁴Nii jaunne, nitohanein esinae rauhijiriin naaonjoaain osa caje ichoteratenojonein nerichaacheinne que cana relaalul Jesocurisitone rijijieein ichacure-nihane coaracaanne jaun, satiin ecu Jesocurisito esenetaeranein nenacaauru acatiha nii Fedoro teteriin: “Chanuna jataain baaso ichaa Jorioniheichuru rohecaain, Jorionein nihacachene ichao rijijieein ichaauruhane coina. Ii Jorionein, inae acaauru ichao rijijieein jauriaa ichaohilune saijieein,” naain rai aitoonlu.

Esenetaauruhane corenihachate Jorioniheichuru aina jiniiqui osa caje nichoteeururein Jorioocuru

¹⁵Canate cana foerateracuru caje coaunein Jorionein nihacache. Coatiha leeochoaauru cachaaauru, nechu Cana Coaunera coitucuelanaala neein osa que nesarujueein nenacaauru rijijieein nihaacache. ¹⁶Nete laen, nii Moisesa rai Cana Coaunera tenojoi ichaonaa rai rauhi tonoraa

cachane niha natiin, itolere niicha ichai ujuaihoni hane caje nichotena naineni hane coitucuhacache raotojoein. Jesocurisito esenetaa cachanete laen, itolere niicha ichai ujuaihoneein nihane caje ichoterateno-joineein nereein. Nitohaneein nii Moisesa rai Cana Coaunera tenojoi- rauhi esenetaain tonoraain niha cachane nihanatiin, itolere niicha ichai ujuaihoneein nihane caje nichotena naineni hane cachane jaunejian, canacaanu netonai Jesocurisito esenetaa-caanu.

¹⁷Nitohaneein itolere canaacha ichai ujuaihoneein nena caje cana ichoterati ha Jesocurisitone jaunna, osa que nesaru hin nihacache. Aihei, coati ha Jesocurisito esenetaacacachene osa que nesaru ha aihacache. ¹⁸Inae nii Moisesa rai Cana Coaunera tenojoi rauhi jianichaaunne saijieein, nacoauneein rijjijieein nena jerichaaunena laen osa que nesaru ha aicheeun. ¹⁹Esinae rauhijiriin, Cana Coaunera tenojoi ichaonaa que ichaohanune coinane Moisesa rai jauriaa niicha teilu rauhi tonoraain ichaohanune jianeunlu. ²⁰Nitohaneinte coroso que ohin, itolere baaso ichajeein ichaohanune jaan itajeein canu ichao coreein, canu suujueni ha rai Suujue te Jesocurisito. Aihana jaun, jataain canu belaitohane jaun, canu coreni ha ohalu Cana Coaunera Calao hi Jesocurisitone esenetaa-nune jaunne, acaacha que jaaequiin ichaaon. ²¹Coati ha canu belai hane jaun, canu rai Cana Coauneraacha tei ichaonaa que jaoleconaa naini ha aun. Nitohaneein itolere canaacha ichai ujuaihoneein nena caje cana ichoteraneein ni ha nii Moisesa tenojoi rauhine chujianra, inacojoein cana coreni ha orelu Jesocurisitona.

Moisesa rai rauhi aina canaacha esenetai.

3 ¹Galasia cocoaichacuru- aansocuru. Cha inara suujua auhacaain inara ichao core, cha coitucuhi rijjijieein ichaohichene caina. Nii coataane niqiu,

esinae rauhijiriin cana coreni ha Coroso que ohalu Jesocurisitone coitucuaer-teen, inara que coarateein inara relaacaanulu. ²Raujiaain canu tonoraai chene coinane, inara caje bajareeunni: Moisesa rai rauhi tonaraaichene jaunna, inara rai Suujue tein ni ha lu Cana Coaunera. Tana, nii inara relaacaanune esenetaaichene jaun inara rai Suujue ti ha lu Cana Coaunera coitucuhichene. ³Jataainachura cha coitucuhi rijjijieein neeiche, inae acaihaniji que Cana Coaunera Suujue raachelune saijieein, jerecuru ha cachaaunne rijjijieein ichaohin nichotena coaauquichene coinane. ⁴Jataainachura inacojoein, nii caohacha- inaraacha esenetai jianeriquiche caohacha nainejeeinte. Aihei jerihane. Coati ha inacojoein nihei. ⁵Nii inara rai Suujue tein cojoelanaacojoai ichaa Cana Coaunera, coati ha nii Moisesa rai rauhi tonaraaichene jaun ichaai. Inae nii inara relaacaanune jaan aonaain esenetaaichene jaunte ichae Cana Coaunera.

⁶Coaracuchenachuhinti, rai aitoha Cana Coaunera esenetaain queecha jaaecoha Abaraaunne jaun, nii esenetaane coreni hacha niicha ichai ujuaiho nelanaala tein raa Cana Coaunera. ⁷Aihane jaun, sati in Cana Coaunera esenetaain que jaaequiin nenacaauru, Abaraaun nefoerate esine neein neeururichaaine coitucuhin neeuche. ⁸Inoaelu jaiti turueni ha Jesocurisitone ajini ha caje coauneein, nitohaneein Jorioniheichuru netonai, itolere niicha ichai ujuaihoneein neeuruhane caje niicha ichai ujuaiho nelanaala tenajarichaaine jaunte: “Sati in caa chauratane sacutaain nenacaauru cachaaunne ii aina cuaain rausiaereunicha,” naain Abaraaun rai bein, nii caohati erena raotono

laenaeratelu Moisesa que rai Quiricha Inoaensi cuhane Cana Coaunera.

⁹Aihana jaunte, nii esenetaalu Abaraauun ne rijijieein esenetaerate rausiaereein Cana Coaunera.

¹⁰Nitohanihana jaunte, nii Moisesa rai rauhi tonoraain ichaoha cachane nihanatiin caseteco coaraa cureein, “Caseteco coaraate cureein, jitaain caa rauhi laenanohi tonoraelanaala nenea,” naain bein laenaratihalu Moisesa que Cana Coaunerana jaun. ¹¹Nitohanihane jaunte, rauhijiriin nii Moisesa rai rauhi tonoraain ichaoha cachane coreniha coatihä caohacha ichaeraneein tein rarinaain Cana Coaunera. “Jesocurisito esenetaain queecha jaequuin nenaate caohacha ichaeraneein tein rareein Cana Coaunera,” naain laenanohineein nihane rijijieein. ¹²Nete laen, nii Moisesa rai rauhi, raujiaain esenetaa cachane coreniha ichoteratihane coina aitelanaala: “Esinae rauhijiriin aitoa nii rauhine rijijieein, leinjiin niji cautijiaelanaala tonoraerate ichaoreein,” naain laenanohineein ne. ¹³Nitohaneainte, cana cairichaeranu que niha nii rauhine jana, caje cana ichoteratihane coina leinjiin osaaona rijijieein cana osa coreniha ohelu Jesocurisito. Nii quete: “Niicha ichai ujuaihoneein nenea- saain enuha que ucuun tein atinanohi cacha,” naain Cana Coaunera Quiricha cuhane laenanohineein ne. ¹⁴Nitohaneainte ichaelu Cana Coaunera, sattiin cachaauru rausiaaecane coina, Abaraauun rai aitoahalune rijijieein, Jesocurisito aina cuaain Jorioniheichuru netonai rausiajееin, nii esenetaain queecha jaecohacachene, nii naitoonjoan rai Suujue tiha cana raine coina.

Moisesa rai rauhi aina, cana rai tihane coina Cana Coaunera aitoonjoan.

¹⁵Aonacuchene inara rai, joanreein cacha rijijieein inara rai aitete coitucuhi-

chera canejeraauru. Leinjiin cacha, chaelai ichaane coina aitiin laenaain, ecu tein curuaa laenaa ne. Nihei nii niicha laenai jojohin, niheichu nii niicha laenai jaonaa nainihe chuni. ¹⁶Nii rijijieinte, Abaraauun aina rai nefoerate, naaonjoain rai, esinae rauhijiriin niicha teenu tihane coina aitelu Cana Coaunera. Coatihä: “Nefoerateeuru,” naain laenanohinihei Cana Coaunera Quiricha cuhane. Nitohaneein arajii que aitelanaalate leinjiincha que: “Ti nefoerate,” naain laenanohineein ne. Jesocurisito quete nii aite. ¹⁷Naonjoain quene inara rai caa aitoon; Cana Coaunera, Abaraauun aina cuaain cana rai niicha teeni tihane coina esinae rauhijiriin nohanelanaala aitelu. Inae jauriaanejeein Abaraauun rai besihalune baiha jena fasha jaanacanein catiaainte nenea ne nii Moisesa rai rauhi. Nii jaunte, nii ichoachaniha Abaraauun rai aitosihalune jaan itajenaa nainene Cana Coaunera. ¹⁸Nii Moisesa rai rauhi aina cuaain nii Abaraauun rai niicha benatei tiha Cana Coaunerane, coatihä chaque nelateriheii nii cana rai niicha benatei. Nete niha Moisesane ajiniha Abaraauun aina cuaain cana rai niicha teenu tiha core colanene coinäte aitelu Cana Coaunera. ¹⁹Aihana jaun chaque nelate nii Moisesa rai rauhi. Acate, turuha nii nefoeratenaa- nii Abaraauun rai naitoonjoane reentiaain, esinae rauhijiriin tonoraain ichaaoreniha cachaaurune coaratihane coina tenojoineein nelu. Rai letono aanjera quete nii rauhi teratelu Cana Coaunera. Jana Moisesate cachaauru rai beraneein nelu. ²⁰Nete laen, bera colane raajenihane nii niicha teenu que aitelu- leinjiin acaacha neein nenea Cana Coaunera.

Naonjoaain coinäte nelu nii rauhi.

²¹Cana Coauneraacha ichanenu aina ita rijijieein niha nii Moisesa rai rauhina jaunna nii niritiin niha. Aihei, coatihä ita rijijihai. Nii

rauhi, cana rai ichaonaa teranihanechujanra, satiin nii rauhi tonoraain nenea, itolere canaacha ichai ujuaihoneein nenea caje nichoteein nerichaachena. ²²Nete, Cana Coanera Quiricha aina cuaain, satiin nii Moisesa rai rauhi tonoraain nenihacachene coreniha osaaonaneein nihacachene coitucuhacache. Nitohaneein coitucuhin, Jesocurisito esenetaacachenete, inae nii Cana Coaneraacha teenu ranaa nainerichaa-cheein.

²³Nii jaunte, jaiti turueniha nii canaacha esenetai jaaeconaanajane jana, caseteco coaracaachene coina mucuhineein cana sirilu nii Moisesa rai rauhi, turuha nii canaacha esenetaine reentiaaajoaain. ²⁴Nii Moisesa rai rauhite, canaanaihuru amaa beraichane rijjijieein, Jesocurisito rai cana amaeraneein nelu, nii Jesocurisito esenetaacachene, itolere canaacha ichai ujuaihoneein nenea caje ichoterate-nohineein nihacachene coina. ²⁵Nii jaunte laen ena, inae turuha nii jaecohacachene jaan canaacha esenetaine jaun, cana beraichaneein niha nii rauhine caje mituhacache. ²⁶Nitohaneein inae Jesocurisito esenetaaichene jaunte, satiin inara, Cana Coanera calaohi rijjijieein neeiche. ²⁷Inae nii esenetaaichene aina cuaainte baotisaain coujunacatenohineein Jesocurisito aina neeichene, niicha tei ichaonaa que ichaohiche. ²⁸Aihana jaun, Jorionein, Curieconein, letononeein, nirijjieein letononelanaala, quichaauru, enecuru, naaonjoaainein neeichene nihanatiin, inae nihei nii que cha. Inae Jesocurisito aina jiniiquiin neeichene jaunte, lelaurijiei caje ranojoneein nenea rijjijieein neeiche. ²⁹Nii jaunte, Jesocurisito esenetaeraneein neeichene jaun, Abaraun nefoerateneein, nii rai tihane coina Cana Coanera aitoonjoalu raeraneein neeiche.

4 ¹⁻²Naaonjoaane jaunne caa inara rai aitoon. Jaiti canaanainiha nii itolere rai inaca rucuhele eroraneein

neeninete, jerichanejeein letono rijjijieein ne, esinae rauhijiriin satiin nii rucuhele erora nihane saijieein, jaiti canaanai nihane jaun. Nitohaneinte leeocho cacha que beraichaaain ne jinaa tiha inacane jaan que tihane reentiaaain. ³Nii rijjijieein techu, jaiti turueniha Jesocurisitone bana, nechu cana itajeranunein caa chauratane que nenea que beraichaaain nihacachelu. ⁴Nete, inae nitohanihane coina jinaa tihalune jaan que inae turuhane jaun, rai Calaohi letoaelu Cana Coanera, cachanein leinjiin ene caje nejanoaane coina. Acaachate cana amute cachanein nii Moisesa tenojoi rauhi tonoraera rijjijieein ichoaelu. ⁵Nii corenihate cana cairichaeraneein niha nii rauhine caje cana rocohin nelu, rai calaohineein cana teein cana raa Cana Coanera coina. ⁶Nii jaunte, inae esinae rauhijiriin rai calaohi nihacachene coaratihara rai Calaohi Suujue te cana suujuenihara Cana Coanera. Nii rai Suujuete cana suujuenihara neein: "Ofa," naain Cana Coanera bajae. ⁷Aihane jaun inae ii, nii rauhi tonoraeraneein niheei. Iite, inae Cana Coanera calaohineein neei. Nitohaneein rai calaohineeine jaunte, Aca jerihane rijjijieein, ii que banijjiaineein nenea raeraneein neriiquiin.

Jesocurisito esenetaeraauru que suujuaa Faborone

⁸Jaiti, Cana Coanera coitucuelanaala neeichene banate, cha nelanaala nenea-cana coanera niha nocoeonacaauru letononeein nerejetocoichelu. ⁹Nete laen, inae enene Cana Coanera coitucuhichene jaun, inara coitucue Cana Coanera. Aihana jaun, chanuna coaiten nacoaanein nii chaque nelatiheichuru- cairicheineein

nenacaauru tonoraain letononeein nenea jeriquiche. ¹⁰Nitohaneein neeichene jaunte, nii enanetojoeein jauriaa aichejetocoichelune rijijieein, atencuru, cojoinacaauru, ajaanaacuru, naaonjoaaihunri cojoinaca que turuhane inara rai chosichuru corojeein bitoaaiche. ¹¹Nii jaunne jataain casihun, cacoichana aina cutaain inara relaanelune saijieein nitohaneein neeichene jaun.

¹²Canejerauru, canu Jorionichaaunne jaunne niqui nii taolu inoaelu nenea rauhi tonoraain ichaorejetoonu. Nena inae enene nii jauriaa nii rauhi tonoraelanaala ichaorejetocoichene rijijieein inae enene ichaaon. Aihana jaun nacoauneein nii rauhi colane inoaelu ichaohichelune rijijieein ichaaoche.

Nii jauriaanejeein inara relaanelune bana coatiha canu que jaoleconaa coaauheechelu. ¹³Nenacaaentejia cunaitichaaunne saijieein jauriaanejeein inara rai ichoteratenojoeinein neriquicheene beebejihanune bana, jataain rachoojoeein canu corojeein canu raachelu canu coiintena coacuelanaala. ¹⁴Nii cunaitichaaunlune banate, esinae rauhijiriin, nii canu cunai coreniha canu que jaolequelanaala, niheichu canu coiintelanaala, naaonjoaain leinjiin Cana Coaunera letono- anjera aina Jesocurisito raera rijijieein canu raachelu. ¹⁵Chanuna jana chaen, inae enene nii aachelune rijijieein rachoojoein nenea naineneiche. Esinaete chuhisi niqui, nii cunaitichaaunne jana rachoojoenaa caun roconacainiha inara notane jana nihane, inara nota rocohin teriquichelu canu rai. ¹⁶Nitohanihane saijieein rauhijiriin nohanelanaala inara rai aitocoane jaaunna inara que nejeratenaa nichaaun.

¹⁷Nii cachaaurute niqui jataain inara aina nenea jerecure. Nete, caohachaaun

inara tenaa jerenacaaun aihurene. Nechu canacaanu que jaolequiin, acaauruhacha tonoraain neeichene cointe aihure. ¹⁸Esinaetechuhisi niqui caohachae, leeochoaauru cachaauru rai caohacha ichacaane coina coaaucaane. Aiha esinaen rauhijiriin acaauru rai nelatenenu nihane. Nete itolere bana coacuelanaala, inara aina nihanuneecha que coaacuruhane nelatene. ¹⁹Cacalabi rijijieein neiniquichene corenihane, jataain coacuhin cunaiteeun. Charijieein teeinti, canaanai janoanaa jerihane cunae rai neba, nii rijijieeine inara coreniha cunaiteeun. Nirijieeine, itolere bana cunaiteeriin nereeuni, esinae rauhijiriin jeriha Jesocurisitone rijijieein neeichene reentiaaajoaain. ²⁰Bajiaana chuhinti ena inara aina neneeun, canu raajenihane inara rai leeocheenein raotojoeein aitocoaaunne coina. Nena inara caje coriaae nihanune jaun inara aina cha chana coitucue- neeun.

Acara aina Sara

²¹Inara, Moisesa tenojoi- rauhi tonoraain nenea jereraauru, canu rai aitocoichenena jereeun. Tana esinae rauhijiriin, aitohalu nii Moisesa rai rauhine aohanraaneein neeichene. ²²Aonacuche: "Coroatajaainte canaanai sirilu Abaraaun. Leinjiin rai calaohite sirilu rai coseenra neein nenea Acara aina. Jana, nii leeochoa rai calaohi coroatajate sirilu rai comasai esine neein nenea Sara aina," naain aitohane coitucuhichene. ²³Nii jaunte, nii rai coseenra aina Abaraancha sirii- rai calaohi cathanichaachene ichao rijijieein nihane coina nejanoaelu. Nete laen, nii rai comasai esine- Sara aina niicha sirii- rai calaohi, rai aitosihalu Cana Coaunerane jaan nainaane coina nelu. ²⁴Naaonjoane jaunte nii

nitohane, nii coroatajai Abaraaun comasaichurute, coroatajaain cana aina niicha ichanenenu ichaa Cana Coaunerane coujunacaneein neure. Nii Acarte Sinaai bichataneu, Moisesa rai ajeri caje nena- tabara que teein laenanohineein nena- rauhi tihalu Cana Coaunerane coujunaca ne. Nii rauhi tonorana nainelanaala neenihurute nii coina nejanoaain neure.

²⁵Nitohaneinte, nii Arabia nena- Sinaai bichataneu Moisesa ranojoi rauhi tonoraeraneein, Jerosaleen cocoaichaneein nenacaauru foeratera ne Acara.

²⁶Nete laen cana, nii Jerosaleen cana que banihateein coaunanojoi cocoaichaneein nihacachene coina, nii comasai esine Sara aina Abaraauncha sirii nefoerateneein nejanoaain nihacachelune jaun, rai calaohi esineneein nihacache. ²⁷Nii quete:

“Rachoojoein neeu canaanai sirina inaelanaala nena ene, cojoriin rachoojoeu chabana canaanai sirineeine saijieein.

Jaoleneein neeine nihanatiin, lanaaona amurijiriin arajiin canaanai siririquire jaun,” naain laenanohi ne.

²⁸Canejeraauru, ichaane coina aitothalu Cana Coaunera, Abaraaun raine rijjijeeinte nenaanelu Isaca. Nii rijjijeeinte inara netonai nenaaneei neeiche. ²⁹Nii bana cachanichaachene ichao rijjijeein Acara aina Abaraauncha sirii rai calaohite nii Cana Coaunera Suujue ichanohineein nejanoanaa Isaca ichao rohecaelu. Nii rijjijeein techu enanetojoein inara netonai rohecaature nii Cana Coaunera Suujue ichanohinelanaala nenacaauru cachaauru. ³⁰Nete nii que: “Nii rai calaohi aina, nii ii coseenra sitaaute amuhine. Coatiha nainihe, nii ii comasai esine aina iicha sirii- ii calaohi

aina, nii ii rucuhene eroraneein nihane,” naain laenanohineein ne Cana Coaunera Quiricha cuhane. ³¹Aihana jaun, coatiha nii coseenraneein nena nefoerateneein nihacache. Nii comasai esineneein nena nefoerateneeinte nihacachera canejeraauru.

Inae Moisesa tenojoi rauhi caje jianacoon nihacache.

5 ¹Jesocurisitote, Moisesa tenojoi rauhi coreniha caseteco coaracaa- chene rai nena caje cana rocohin nihane jaun, inae raotojoein jianacoon nihacache. Aihana jaun, nainiheiche nacoaunein nii Moisesa tenojoi rauhi tonoraain nenacaauru aina acaauruhacha ichai ichaain nihache.

²Canu Faboro nichaaunne aonacuchena, inara rai aitate aonaquiche. Aitocuruha Jorioocurune rijjijeein nii Moisesa rai ruhin tonoraain inara jaberoco macohi cari saerateeichene, coatiha inara rai cha que nelatein nerinaain jianacoon neeichene coina Jesocurisito esenetaaichene jaan.

³Coaiteen nacoauneine aitoon. Chunocoha Jesocurisito cachanein nena Moisesa tenojoi rauhi caje ichoteratenojoein nihalune saijieein nacoaunein nii rauhi tonoraane coina rai jaberoco cari saerateein nenaate leinjiiniji cautijiaelanaala nii Moisesa rai rauhi tonoraanete ne. ⁴Inara, inae jauriaa jeriha Jesocurisitone rijjijeein ichaohichene coina esenetaaichene saijieeinte, ena Moisesa rai ruhicha tonoraain nena jeriquiche, Jesocurisito aina inara belaiha Cana Coaunerane jaan que jaolequiin. ⁵Nete laen cana, rai Suujue cana rai niicha tei aina cuaain esenetaacachene jaun, itolere canaacha ichai ujuaihoneein nena caje nichoteri- chaacheinne que jaeequiin cohajihacache. ⁶Aihana jaun, Jesocurisito aina

jiniiquin nihacachene, inae nelatihei cana jaberoco macohi cari saeratihacachene. Esenetaain queecha jaaequiin nihacachenete laen nelate, nii esenetaain nihacachene aina cuaain ita belaaain ichaohacachene coina icharihanine jaun.

⁷Inarate niqui inae esenetaain queecha jaaequiin neechelu. Chariji cacha inara coritaane jaun, nii inaraacha esenetai tonoraain neeichene jianequiche. ⁸Tana Cana Coaunera jerihane jaun inara cotijiaain nihalune coitucuhichene. ⁹Nete, “Aansijiin coerati que rai coliha jasiitihacanete, jitaain nii rai coliha ichonai coeralae,” naain nihane coitucuhiche. Nii rijijieein leinjiin cacha inara ichao auhacaain aasaeraneein ne. ¹⁰Nena canu, leechaneein inara suujua cuaaichene coataa, inara coroatajanerichaaain cana Curuaanaa Jesocurisitone esenetaaun. Nete laen, nii joaenreein inara suujua auhacaera cacha casetecareein Cana Coaunera. Coatiha chunocoha aihane nihanatiin que Suujua acatena nainerinaain.

¹¹Canejeraauru, jauriaa aihanulune rijijieein enanetojoein rai jaberoco macohi saerateeuruha satiin Jesocurisito esenetaeraaurune coina acaauru conujichaaunne, coatiha canu cairichaaaururihei Jorioocuru. Nitohaneein jerecuruhane rijijieein nii Jesocurisito beratenojoi beebejihanune acaauru baijiaenerichaaunne jaun. ¹²Nete, raajenihane jitariin rai jaberoco molohin jaaoruha nii inara suujua rohecaeraaurune caohachae.

¹³Canejeraauru, inarate cha ujuaihonelanaala jianacoon raotojoein neeichene coina, cotijiaain ranojoein neechelu. Nete, inae cha ujuaihonelanaala neeichene jaun, naineneiche inara suujua letono rijijieein cha ichaain

neeichene. Nenacaaentēja caohachae nii amuritoheriin, ita belaaain, cha lateein niha leechane corootajaneein, naajoaain neeichene. ¹⁴Satiin nii rauhi aitoonjoan cajete leinjiincha neeje. Acate: “Chamute cacha belaaain ichaao, ii raajenihane ii jaberoco belaaaine rijitoein,” nae. ¹⁵Aihane jaun, nii que necohalajiiin neeuche. Jana necohalajilanaala nejesinajein ita aina obaajerijin, ita cotaariin, naaonjoaain neeichenete inara raajenenihane nitajeriquicheein.

Joaenreein cacha ichao aina, Cana Coaunera Suujue tenojoi ichaonaa

¹⁶Nii jaauna inara rai aitoon, jeriquichene rijijieein baasohacha que coacuhin ichoaelanaala, jeriha Cana Coaunera Suujuene rijijieein coacuhin ichaohichene coina. ¹⁷Nii cana suujua cuhane baaso canaacha coacuite, cana aina Cana Coaunera Suujue ichanenu caohateraneein ne. Nii rijijieein techu nii cana suujua, Cana Coaunera Suujue que nejerataneein ne. Nii corenihate inaraacha ichana jerei ichana naineneiche. ¹⁸Nete esinae rauhijiriin, inaraacha ichanenu ichaquichene coina inara rai beraneein niha Cana Coaunera Suujuene, inae nii Moisesa tenojoi rauhi rijijieein cha ichaquichene jianeriquicheein.

¹⁹Caaintiaai, “Acaauru acaaurute, jeriha suujuane rijijieein baaso ichajein ichaaoe,” naain coitucuhacane. Nitohaneein ichaonacaaurute, sinjeranelaanaala nena e ne que ichaojeraquin, rai chosi rai niicha teeuri iniho que lenoneein, naaonjoaaurne. ²⁰Chaen techu, acaauru chosichuru corojeein, benaneneein, ita coiinteein, ita coana jerelanaala, ita que necoelajaaumaritiin, enaacha obajeein, ita amurijiriin nena coacuhin, ita caje neleruhin,

acaauruhacha coaacuruhane rijjijeein neeuuha leeochoaurune jereein, ²¹ajetoritiiin, achotoritiiin, naajoaain neeuruhane cajete enaacha nitohaneein ichaonacaauru cachaauru coitucuhaca. Nacoauneeinne inararai aitoreeunni, que nainaain ichaohichene coina. Nitohaneein ichaonacaauru, coatiha Cana Coaunera Cojoanonaa que ichaonaa nainecuruhi.

²²⁻²³Nete laen Cana Coaunera Suujue tenojoi ichaonaa, ita belaaain, rachoojoein, raotojoei ichaonaa que ichaohin, cha abaantaain, cana rai chaelai que cainaane latelanaala cacha rai cha teein, nii cana ichao corenaa coacuelanaala, leeochoauru amurijiriin nenea coacuelanaala, cana suujua letono tonoraelanaala nihacachene coina, naonjoaain nihacachene jaanu teraneein ne. Coatiha nihei nii chuni rauhi nitohaneein ichaohacachene caohatera. ²⁴Nitohanihane jaunte, Jesocurisito ranojoein nenacaauru, inae coroso que teein itajera rijjijeein, itolere rai nichao rijjijeein ichaohin neosateein necairichanaa, rai suujua baaso, naonjoaihunri itajeein inae ichoae. ²⁵Nii jaun, inae ena Cana Coaunera Suujue aina ichaohacachene jaun, coanete jeriha Cana Coaunera Suujuene rijjijeein ichaohacache. ²⁶Aihane jaun, necohasitaain, ita amuritona coacuhin, itaque necoelaain, naonjoaain nenea nainihaacache.

Le cachanequichene ita coroatajanecuche.

6 ¹Canejeraauru, osa que nesaruha chunocohane coarquichene, inae inara Cana Coaunera Suujue que suujuecohichene jaun, rai aitocuchete raajenihane baaso ichaane coitucuhin rai suujua coaraain ichaohine. Nete inara netonai, nitohaneein coujunojoein neeichene coataa que necoha-

lajiiin jataain belaaain rai aitocoichene caohachae. ²Nejesinajeein itolere que ita coroatajaneein neeichenete, esinae rauhijiriin jeriha Jesocurisitone rijjijeein ichaoriqicheein. ³Jana chunocoha, chanelanaala nihane saijjijeein leeochoauru amurijiriin nenea coaauca-nete raajenihane necoritareein. ⁴Nii jaunte caohachae, le cachaauru baaso ichaelanaala caohacha ichaane coitucuhin, raotojoein rachoojoein nihane caohachae. Nete laen, leeochoauru baaso ichacuruhane coaraain, acaauru que necohasitaain rachoojoein nihane caohachaene. ⁵Aihana jaun, le cachaaurute naine itolere niicha ichai coitucuhin rai suujua coaraain ichaane caohachae.

⁶Ena Nenea Cana Coaunera Ere que relanojoein nihane, nii relaera coroatajanemiin itolere niicha sirii que.

⁷Jiaonriha inara raajenihane necoritaaichene. Chateinti baaso ichae, niite baaso raeranein nereein. Jana caohacha ichaerate caohacha raeranein nereein. ⁸Nitohanihana jaunte, chunocoha rai suujua letono baasohacha ichajeein ichaonaa itajereein nii baaso- rai suujua cuhane coacuhin niicha ichai. Nete laen, chunocoha jeriha Cana Coaunera Suujuene rijjijeein itolere caohacha nejesina ichajeein ichaohane, nii caohacha- rai suujua cuhane coacuhin caohacha niicha ichaite chabana sanaacharanejeein nenea ichaonaa que tereein. ⁹Aihana jaun, caohacha ichacaachene coiinteein jianena nainihaacache, inae cojoanonaa que turuhane bana cana rai cainanohineri-chaain nii canaacha ichaine jaun. ¹⁰Nii jaunte, satiin rai, nainichaachene jaan que leeochoauru belaaain coroatajaneein nihacachenete caohachae. Chaen jeelai amuritheriin nii canaacha esenetai

coreniha cana nejeraneein nenacaauru corootajanein nihacachenete caohachae.

**Acaauru suujuatein acaauru
rai necoiha Faborone**

¹¹Enane laen, canu raajenhane canu biji que caa quiricha laenaan. Nii jaunte, tabaanae caa canuhacha laenai. ¹²Nii inara jaberoco macohi cari molohichene coina inara rohecaeraaurute, nechu rai lauri aina caohachaain nena jerenacaan aitocure. Nabana Jesocurisito esenetaeranein neeuruhane coitucuhin acaauru sooruhane coataa acaauru coasiha. ¹³Nete, acaauru jaberoco macohi cari moloerateein neeuruhane nihanatiin, satiin aitoa nii Moisesa tenojoi rauhine rijijieein tonorana nainecurene. Chaen techu, inara netonai inara jabereco macohi moloerateichene, inae coujunaca siriha inara jaberocone que necohasitaauruhane coina nii inara rohecaare. ¹⁴Nena laen canu, joareein coreniha necohasitanaa naineneun. Canu coreniha coroso que ohalu Jesocurisitone corenihachane naineun aacha coasitaanune. Nitoha-

neein, canu coreniha coroso que ohalu Jesocurisitone jaun, coitucuelanaala ichaonacaauru cachaauru ichao rijijieein ichaonaa nainihaan. Niheichu Cana Coanera coitucuhichuru nihanatiin, canu arinaa nainecuruhi acaauru rijijieein ichaohanune coina. ¹⁵Coatiha chaque nelatihei, cana jaberoco macohi cari moloerateein, moloeratelanaala, naaonjoain ichaohacane. Jesocurisito esenetaacachene jaunte, ena coauna-nojoi nihacache. Niite jataain nelate.

¹⁶Satiin caitoonjoan tonorain ichaonacaauru cairichaaajoaain coaramii Cana Coanera, raotojoein neeuruhane coina, satiin Cana Coanera cacha esineeuu aina jiniiquiin.

¹⁷Ena caje coaunein, inae nenacaen canu cairichaerateeichene jerinaan. Inae esinae rauhijiriin Jesocurisito letononein nihanune coujunacanein cajabereeo que, canu bisihuruhane jaan cure sirichaaune jaun.

¹⁸Canejeraauru, cana Curuaanaa Jesocurisito jataain jelai amuritoheriin corojeein neeichene jaanu teeine inara rai. Nitohanemiin.